



BILTEN

BR. 23

Informativne novine IZB u Švedskoj

MAJ 2016

UVODNIK



Povodom nastupanja ramazana ovih dana smo mnogo slušali o značaju posta. Mi ćemo ovdje ukazati na nešto o čemu se, ipak, nedovoljno govori. Radi se o kvalitetu našeg posta.

Muhamed, a.s., je rekao:

“Post je štit, pa kad neko od vas bude postio, neka ne bude bestidan, neka ne viče; a ako ga neko bude psovao, izazivao, ili napadao, neka kaže - Ja postim.“

Drugom prilikom je, također, rekao:

„Ko ne ostavi lažan govor (krivo svjedočenje, potvoru i slično) i postupak po tome, Allahu ne treba ni njegovo suzdržavanje od hrane i pića.“

A poznati ashab Džabir ibni Abdullah, r.a., je rekao:

„Kada postiš, neka posti tvoj sluh, tvoj pogled i tvoj jezik od laži i svega drugog što je zabranjeno. Kloni se uznemiravanja pa i svog sluge i neka se na tebi vidi ljudskost i smirenost. Neka ti se dan kada postiš razlikuje od dana u kom ne postiš.“

Zbog svega izrečenom, naši vrli preci imali su običaj kazati:

„Najlakše je postiti od jela i pića...“

Nije, dakle, dovoljno samo ne jesti i ne piti. Podjednako je važno dok postimo da vodimo računa o svom ukupnom ponašanju.

Ukazujemo na još nešto. Često, naime, govorimo kako je veliki sevap pripremiti i pozvati nekoga na iftar. To je, naravno, tačno, ali u pripremanju iftara počesto se puno pretjeruje, pa se na iftarima previše jede, a i puno se hrane, nažalost, baca.

Uz podsjećanje da Allah, dž.š., ne voli pretjerivanje, dovimo za Njegovu uputu i zadovoljstvo.

Idriz-ef. Karaman

„Kada postiš, neka posti tvoj sluh, tvoj pogled i tvoj jezik od laži i svega drugog što je zabranjeno. Kloni se uznemiravanja pa i svog sluge i neka se na tebi vidi ljudskost i smirenost. Neka ti se dan kada postiš razlikuje od dana u kom ne postiš.“

SADRŽAJ

- Seminar za imame
- Dan bijelih traka
- Mektebski izlet
- Dr.hfz.Halil Mehtić
- Završnica mektebske godine
- BKC susreti
- Hutba
- Bosanska kuća

- Pitanja i odgovori

U ÖREBRU ODRŽAN SEMINAR ZA IMAME I SKUPŠTINA UDRUŽENJA ILMIJJE IZB U ŠVEDSKOJ

U gradu Örebro 4. juna 2016. godine održan je predramazanski seminar za imame Islamske zajednice Bošnjaka u Švedskoj. Seminaru su prisustvovali gotovo svi imami, a fokus seminaru, pored ramazanskih aktivnosti, bila je budućnost funkcije glavnog imama IZBUŠ. Prvi dio seminara posvećen je organizaciji aktivnosti u toku mjeseca ramazana, a u drugom se diskutiralo o funkciji glavnog imama IZBUŠ, nakon čega su imami dali podršku Idriz-ef. Karamanu da idalje obnaša ovu funkciju.

Po završetku seminara podijeljeni su blokovi za zekat i sadekatu-l-fitr i komplet knjiga koje je Rijasetov Centar za dijalog - Vestijja poklonio svim imamima. Poslije završetka seminara, imami su obišli impozantni objekat koji gradi Džemat u Örebro.

Da još kažemo, dan uoči seminara održana je Skupština Udruženja ilmije IZBUŠ.

Za predsjednika je ponovo izabran Nezir-ef. Špiodić, a u Upravni odbor: Alen-ef. Delić, Hasan-ef. Jašarević, Hamza-ef. Terzić i Benjamin-ef. Dučić.

Odličan domaćin ovog dvodnevnog skupa bio je Džemat Örebro.

I.K.



Članarina preko poreza

Broj potpisanih pristupnica u džematima IZBUŠ		
	26-04-16	20-05-16
Malmö	1421	1425
Stockholm	1154	1154
Göteborg	806	812
Borås	693	695
Norrköping	576	581
Skövde	519	530
Gislaved	427	427
Helsingborg	421	421
Landskrona	418	421
Trollhättan	317	320
Jönköping	305	306
Linköping	292	294
Trelleborg	274	280
Växjö	244	245
Halmstad	222	222
Örebro	164	165
Motala	158	149
Vetlanda	91	95
Surte	87	87
Varberg	60	64
Västerås	41	41
Karlstad	25	25
Värnamo	19	19
Kalmar	2	2
Karlskoga	0	0
Oskarshamn	0	0

U MALMEU OBILJEŽEN DAN BIJELIH TRAKA



31. maja 1992. godine vlasti bosanskih Srba u Prijedoru naložile nesrpskom stanovništvu da na ruke stave bijele trake, a na kuće izvjesje bijele čaršafe i na taj način to stanovništvo prepuste na milost i nemilost vojnih i paravojnih srpskih formacija. Time je otpočeo zločin stravičnih razmjera u kojem je do kraja rata ubijeno i nestalo 3 176 Prijedorčana, uglavnom civila.

U znak sjećanja na ova stradanja, Bošnjačka islamska zajednica je 31. maja 2016. organizirala veliku manifestaciju. Manifestacija je održana na Trgu Gustava Adolfa, a prisustvovao je veliki broj građana porijeklom iz Bosne i Hercegovine, ali i Šveđana.

Pored predstavnika Džemata Montasera Eneima, skupu su se obratile Amela Hodžić, član rukovodstva regije Skåne i Rebecca Liljan, ispred Jevrejske zajednice.

Govornici su podsjetili na stradanja Bošnjaka na teritoriji cijele BiH, a posebno u Prijedoru, naglasivši kako borba protiv fašizma ni danas nije završena.

Posebno dirljiv bio je govor Amele Hodžić, koja je rođena Prijedorčanka, a danas vrlo uspješna političarka u Švedskoj.

Gospođa Rebecca podsjetila je na stradanja svojih predaka za vrijeme Drugog svjetskog rata, povezujući to sa genocidom u Srebrenici.

Posjetioci manifestacije mogli su pogledati i izložbu slika o stradanjima u agresiji na BiH.

Podsjetimo, obilježavanje Dana bijelih traka pokrenula je inicijativa "Jer me se tiče" iz Prijedora, a cilj im je ostvarivanje ljudskih prava i sloboda za sve, bez obzira na etničku pripadnost, kao i borba za prava civilnih žrtava na sjećanje, komemoracije i memorijale.

I.K.

IZLET ZA POLAZNIKE MEKTEBSKE NASTAVE DŽEMATA U MALMEU



Prvog vikenda u mjesecu maju uspješno je realiziran trodnevni izlet za polaznike mektebske nastave u džematu Malmö. Ovo je već tradicionalna aktivnost, koju djeca posebno vole. Ove godine putovalo se u poznato izletišta „Barnens by“, 120 km udaljenom od Malmea, a na put je, sa svojim muallimima Alen-ef. Delićem i Hasan-ef. Jašarevićem, krenulo 58 djece i 32 roditelja. Polaznici su bili smješteni u tri objekta, sa po 30 kreveta, a program je bio izuzetno bogat. Organizirana su razna takmičenja. Naravno, fokus je bio na mektebskoj nastavi, ali i drugim oblastima. Djeca su bila podijeljena u dvije grupe, „plave“ i „žute“, a nakon svih takmičenja proglašen je pobjednik. Poseban osjećaj bio je zajedničko obavljanje namaza u prirodi.

Sudeći po raspoloženju djece i roditelja, ovaj će izlet svim prisutnim ostati u trajnoj uspomeni. Koristimo, na kraju, priliku da se zahvalimo svim roditeljima koji su pomogli u organizaciji i, naravno, rukovodstvima džemata i džematskog Bemufa, koji su prepoznali značaj ove aktivnosti i u potpunosti je zajednički isfinansirali.

Alen-ef. Delić

PREDAVANJE DR.HFZ.HALIL MEHTIĆ



20. maja 2016. godine u posjeti džematu Norrköping, boravio dr. hfz. Halil-ef. Mehtić, dekan Islamskog pedagoškog fakulteta u Zenici. Dr. Mehtić je održao predavanje, predvodio akšam namaz, a nakon toga se družio sa džematlijama ovog džemata.

Završnica mektebske nastave u džematu Norrköping



28. maja 2016. godine održana je završnica mektebske nastave u džematu Norrköping, uz prisustvo velikog broja polaznika mekteba i njihovih roditelja. Program su izveli sami polaznici, koji su učeći Kur'an, izvodeći ilahije i recitacije, citirajući kur'anske ajete i hadise, pokazali znanje stečeno u mektebu.

Ukupno 135 polaznika pohašalo je mektebsku nastavu u ovoj godini.

Svojim prisustvom ovaj skup su uveličali glavni imam IZBUŠ h. Idriz-ef. Karaman i predsjednik IZBUŠ g. Sakib Kenjar. Na kraju programa oni su se obratili prisutnim, iskazavši svoju podršku džematu, kao i podršku projektima koji su pred džematom u budućnosti.

Hfz. Jusuf-ef. Horozović

BKC SUSRETI



U subotu, 14. maja 2016. godine, džemat Skövde bio je domaćin ovogodišnjih proljetnih susreta BKC regije Västa Götaland, kojoj pripada 5 džemata. S obzirom na raštrkanost džemata Skövde, Izvršni odbor je donio odluku da susrete organizira u gradu Lidköping, sa namjerom da afirmira i taj dio svoga džemata, što je za svaku pohvalu, a može i poslužiti kao primjer drugim džematima. Kao i svaki ozbiljni domaćin tako je i naš domaćin veliku pažnju posvetio pripremi hrane i poslastica pa tako niko od gostiju nije mogao da ostane ravnodušan na specijalitete koji su se našli na bogatoj trpezi.

Poslije obavljenog ručka i podne namaza, pristupilo se i oficijalnom dijelu programa. Nakon iskazane dobrodošlice domaćina, prisutnima se obratio glavni imam Islamske zajednice Bošnjaka u Švedskoj Idriz-ef. Karaman. On je u svom kratkom izlaganju istakao važnost mektebske nastave, te dao neka uputstva koja bi mogla poboljšati rad mekteba.

Program manifestacije, kojeg je Smajo-ef. Šahat pripremio sa svojim džematlijama i polaznicima mektebske nastave, bio je ispunjen učenjem ilahija i kasida, igrokaza i recitala. U sklopu prigrama prisutnima se obratio i poseban gost za ovu priliku iz Bosne i Hercegovine profesor Mustafa-ef. Spahić. Svojim načinom obraćanja, bogatstvom informacija koje posjeduje, svojom vještinom govora i interpretacijom svoga znanja sve prisutne je počastio predavanjem kojeg će zasigurno dugo pamtili.

BOSNIAKISKA ISLAMISKA SAMFUNDET

ISLAMSKA ZAJEDNICA BOŠNJAKA U ŠVEDSKOJ

U toku pauze, koja je namijenjena za upoznavanje i druženje, organizator je odlučio da se i to vrijeme iskoristi u zabavi i sticanju znanja o vjeri pa je organizovao igru *tipspromenad*. U ovoj igri briljirali su džematlije iz Göteborga, kojima ovim putem čestitamo na osvojenim nagradama, a njihovom imamu Fuad-ef. Čoliću, koji ih je podučio i prenio znanje o vjeri, odajemo priznanje za uspješan rad s njima.

Kao šlag na tortu, na samom kraju našim najmlađim je priređeno specijalno iznenađenje. Nastupio je mladi i uspješni Bosanac u Švedskoj, madžioničar Aldin, koji je svojim vještinama i trikovima mamio uzdahe najmlađih.

Kažimo još da je profesor Mustafa-ef. Spahić, prilikom svog boravka u Švedskoj, obišao i naše druge džemate u sastavu BKC. U petak na džuma namazu bio je hatib u džematu Göteborg, te gost predavač na donatorskoj večeri istog dana, kojom prilikom je govorio o značaju vakufa.

U nedjelju je profesor Spahić prisustovao mektebskoj završnici u džematu Trollhättan.

IO BKC



Hutba: „O zekatu“

Hvala Allahu, dž.š., salavat i selam Njegovom poslaniku Muhamedu, s.a.v.s.

Draga braćo!

U današnjoj hutbi govorimo o zekatu.

U Kur`anu stoji:

„Oni koji vjeruju i koji čine dobra djela, i koji namaz obavljaju i koji zekat daju – njima pripada nagrada kod Gospodara njihova. Nema njima straha, niti će oni tugovati.“ (El-Bekara, 277)

„A za milostinju koju udijelite da biste se Allahu umilili – takvi će dobra djela svoja umnogostručiti.“ (Er-Rum, 39)

„Uzmi iz njihove imovine zekat, da ih njime očistiš i blagoslovljenim učiniš“. (Et-Tevba, 103)

Muhamed, a.s., je rekao:

„Zaštitite svoj imetak davanjem zekata.“

„Kad daš zekat na svoj imetak, ispunio si obavezu.“

„Izdvoji zekat iz svog imetka jer te on čisti, pazi svoju rodbinu, ne zaboravi pravo siromašnog, komšije i onog ko prosi.“

Slijedeći ove kur`anske riječi i riječi Muhameda, a.s., hazreti Ebu Bekr, r.a., nakon što jedna grupa odbila da dadne zekat, izgovorio poznate riječi:

„Tako mi Allaha, borit ću se protiv onoga ko pravi razliku između namaza i zekata. Allaha mi, ko odbije samo jedno davanje, koje je činio u vrijeme Poslanika, ja ću se boriti protiv njega.“

Zekat je, dakle, dužnost i obaveza muslimana, a njegovo prikupljanje odgovornost predvodnika muslimanske zajednice.

Na temelju Kur`ana i sunneta, u svojstvu poglavara Islamske zajednice u Bosni i Hercegovini, reisu-ulema Husein-ef. Kavazović je prije nekoliko godina obznanio fetvu po kojoj je izdvajanje zekata u fond Beltu-l-mal Islamske zajednice u Bosni i Hercegovini obaveza svakog muslimana i muslimanke, koji pripada ovoj Zajednici. Nastavak je to prakse koja je ustanovljena još u vrijeme jednog od naših najvećih alima Husein-ef. Đoze.

Treba ovdje podsjetiti da se ova obaveza odnosi samo na imućne muslimane. A imućan se smatra onaj ko u svom posjedu ima vrijednost nisaba, uz uvjet da taj nisab u njegovom vlasništvu pregodini. Inače, vrijednost nisaba u ovom trenutku je 3 268 eura (u krunama oko 31 000). Dakle, ukoliko čovjek posjeduje ovu sumu, ili više od toga, i tokom godine se ta suma ne umanjuje, dužan je izdvojiti zekat u visini 2,5 % od te sume.

Podsjetimo, također, da obavezu izdvajanja ne treba ostavljati samo za ramazana. Obaveza nastupa onog trenutka kad sredstva pregodine kod nas.

Islamska zajednica se pobrinula da su blokovi za zekat dostupni tokom cijele godine i možemo konstatirati da sve više naših ljudi zekat izdvaja i izvan ramazana.

Smatramo još važnim naglasiti da posljednjih godina značajan broj naših džematlija obavezu zekata izvršava u Domovini za vrijeme godišnjih odmora.



Hatib:
Idriz-ef. Karaman,
glavni imam

Iz najmanje dva razloga, preporučujemo da se to, ipak, obavi u Švedskoj.

Prvi razlog je što bi u tom slučaju ukupni rezultat akcije prikupljanja zekata u našoj Zajednici bio znatno bolji, a drugi, što bi od procenta koji se zadržava, bilo znatno više sredstava našoj Zajednici i našim džematima.

I na kraju, treba kazati da, da u pogledu načina prikupljanja i raspodjele, sve što se odnosi na zekat, odnosi se i na sadekatu-l-fitr, s tim da se sadekatu-l-fitr izdvaja za svakog člana porodice i, naravno, obaveza sadetatu-l-fitr se izvršava isključivo uz ramazan.

Kad već govorimo o sadekatu-l-fitru, kao i ranijih godina, minimalna cijena sadekatu-l-fitra za Švedsku je 100 kruna, dok je druga kategorija 200 kruna.

Podsjećamo naše džematlije, koji ovu obavezu ipak izvršavaju u Bosni i Hercegovini, da to učine po standardu i cijenama koje važe u Švedskoj, naravno, preračunato u domaću valutu.

Ovu hutbu završavamo dovom Allahu, dž.š., da nam omili davanje, da ovu obavezu usvojimo kao nešto bez čega ne možemo i time obezbijedimo bereket i sreću sebi, svojoj porodici i svojoj Zajednici.

Amin!



Poštovana braćo i sestre!

Zahvaljujemo vam se što ćete odvojiti potrebno vrijeme i pročitati ovaj tekst sa kojim želimo da vas upoznamo o provedenim i planiranim aktivnostima oko izgradnje vjerskog, kulturnog i sportskog centra,

Bosanske kuće u Örebro.

O nama

Bosanska islamska zajednica Örebro osnovana je u aprilu 1994. godine i djeluje u sastavu Islamske zajednice Bošnjaka u Švedskoj. Od osnivanja pa do danas nalazimo se u iznajmljenim prostorijama. Prije nekoliko godina započeli smo sa gradnjom vlastitog objekta „Bosanske kuće“, Centra u kojem će se naša djeca, omladina i stariji okupljati, te kroz druženja, kulturne, vjerske i druge aktivnosti raditi na očuvanju i jačanju svog identiteta, vjere, kulture i tradicije. Centar će kroz planirane aktivnosti, ako Bog da, dati i pozitivan doprinos na planu međusobnog razumijevanja, tolerancije i pozitivne integracije u sredini u kojoj živimo.

U Bosanskoj kući koja će, ako Bog da, izgledati ovako bit' će smješteni:



Sadašnje i planirane aktivnosti

Dobrovoljnim priložima iz našeg džemata i priložima koje smo dobijali od vas, uspjeli smo uraditi potrebne zemljane radove i saliti prvu ploču. Nakon toga smo nastavili aktivnosti na iznalaženju najpovoljnijeg načina za finansiranje i nastavak gradnje objekta.

Obzirom da su ponude za izgradnju objekta koje smo dobili od nekoliko firmi bile izuzetno visoke, mi smo odlučili da preko Zavoda za useljenje zatražimo radne i boravišne dozvole za jedanaest radnika iz Bosne i Hercegovine. Nakon nekoliko mjeseci čekanja dobili smo potrebne dozvole za radnike tako da su oni 1. aprila ove godine nastavili sa gradnjom objekta.

Mi planiramo da, uz Allahovu i vašu pomoć, do Ramazanskog bajrama pokrijemo objekat, postavimo vanjsku stolariju i uradimo fasadu.

O toku dosadašnjih radova svakodnevno dajemo informacije sa fotografijama na našoj facebook stranici. „Lajkajte“ i dijelite dalje sa vašom rodbinom, prijateljima itd. www.facebook.com/bosanska.kuca

Pošto se radi o velikom objektu, a sredstva koja imamo trenutno na raspolaganju nisu dovoljna za završetak radova, odnosno useljenje, prinuđeni smo da ponovo pokrenemo širu akciju za prikupljanje novčanih sredstava za završetak radova na objektu. Iz tog razloga se i vama obraćamo sa molbom da svojim prilogom pomognete da se ovaj lijepi objekat što prije sagradi.

Örebro, 15. maj 2016





Bemuf

Muslimanski omladinski
savez u Švedskoj
www.bemuf.org



24h uživo prijenos iz
Mekke uz učenje
Kur'ana
YouTube:
"Makkah Live HD"

Ukoliko vam se naša ideja dopada i želite da
doprinesete izgradnji Islamskog Centra u Örebro i upišete
se u knjigu dobrotvora možete to učiniti na sljedeće načine:

Uplate iz Švedske:

Na Swish: 123 563 84 16

Na PlusGiro: 185 71- 0

Uplate izvan Švedske:

PAY TO: NORDEA BANK AB, BOX 1615, 701 16 Örebro

SWIFT KOD: NDEASESS

IBAN: SE 28 9500 0099 6034 0018 5710

BENEFICIARY: Bosniska islamiska församlingen

Stångjärnsgatan 3, 703 63 Örebro, Sweden



PITANJA I ODGOVORI

Na Vaša pitanja odgovara muftija
dr. Enes Ljevaković.



Vaša pitanja možete slati na e-
mail:

pitanja@rijaset.ba

Pitanje:

Esselamu alejkum!

Dobila sam informaciju da nije preporučljivo prati zube pastom za zube u toku posta, pa me interesuje da li je post neispravan ako se na ovaj način zubi operu?

Odgovor:

Pranje zuba uz upotrebu zubne paste ne kvari post uz uvjet da se ne proguta bilo šta od korištene materije.

www.islamskazajednica.ba



POZIV NA SARADNJU

Oglasite se i Vi u Biltenu IZB u Švedskoj!

Javite nam se sa vašim tekstom, prijedlogom, primjedbom i sugestijom.

e-mail: bilten@izb.se



BILTEN

Informativne novine

Islamske zajednice
Bošnjaka u Švedskoj

GLAVNI UREDNIK

Idriz-ef. Karaman
glavni imam

IZVRŠNI UREDNIK

Almedin-ef. Spahić

REDAKCIJA:

Savjet glavnog imama:
Hasan-ef. Jašarević
Fuad-ef. Čolić
Elvedin-ef. Bešlija

Stari brojevi/arhiva:

www.izb.se/index.php/bilten

Saradnici u ovom broju:

Tarik-ef. Buza

Hazim-ef. Gurda

Alen-ef. Delić

Hfz. Jusuf-ef. Horozović